


Frohe Weihnachten! Gëzuar Krishtlindjet!



Lindja e Jezusit

Luka 1+2

Lajmërimi i lindjes së Jezusit.

²⁶Në muajin e gjashtë të barrës së Elizabetës, Perëndia e dërgoi engjëllin Gabriel në një qytet të Galileesë, që quhet Nazaret, ²⁷te një e virgjër me emrin Mari. Ajo ishte e fejuar me një njeri me emrin Jozef, që ishte nga fisi i mbretit David. ²⁸Engjëlli erdhi te Maria dhe i tha: «Të përshëndet, o e zgjedhur! Zoti është me ty!» ²⁹Maria u tremb nga këto fjalë dhe nuk e dinte ç'do të thoshin. ³⁰Engjëlli vazhdoi: «Mos ki frikë, o Mari, sepse Perëndia të ka zgjedhur (të lindësh Mesinë). ³¹Ti do të mbetesh shtatzënë dhe do të lindësh një djalë. Do t'ia vësh emrin Jezus. ³²Ai do të jetë i madh dhe do të quhet Bir i të Lartit (Perëndi). Zoti Perëndi do t'ia japë mbretërinë e Davidit, stërgjyshit të tij. ³³Do të sundojë përgjithmonë mbi pasardhësit e Jakobit. Sundimi i tij do të jetë pa fund.» ³⁴Maria e pyeti engjëllin: «Si do të ndodhë kjo? Unë jam akoma e virgjër!» ³⁵Ai iu përgjigj: «Shpirti i Zotit do të zbresë në ty dhe fuqia e Tij do ta realizojë këtë. Për këtë arsye ky fëmijë që do ta lindësh do të quhet I Shenjti, Biri i Perëndisë. ³⁶Edhe Elizabeta, kushërira jote, pret t'i lindë djalë — pavarësisht se është plakur. Ajo është tani në muajin e gjashtë të barrës, megjithatë njerëzit thoshin për këtë se nuk mund të lindë fëmijë. ³⁷S'ka asgjë të pamundur për Perëndinë.» ³⁸«Unë jam plotësisht në dorë të Zotit. Le të ndodhë ashtu siç the ti — tha Maria. Pastaj engjëlli u largua nga ajo.



Lindja e Jezusit, Mesisë

2 Në atë kohë doli një dekret nga perandori August*, që të bëhej regjistrimi i popullsisë në mbarë tokën*. ²Ishte hera e parë që ndodhte një gjë e tillë. Atëherë ishte Kuirini* guvernator i Sirisë. ³Kështu shkoi secili në vendlindjen e të parëve, që të regjistrohej atje. ⁴Edhe Jozefi u nis për rrugë. Nga Galileja shkoi në Bet-Lehem, që ndodhet në Jude. Ky qytet ishte vendlindja e mbretit David. Duhej të shkonte atje, sepse ishte një pasardhës i Davidit. ⁵Maria, e fejuara e tij, e shoqëronte. Ajo ishte shtatzënë. ⁶Gjatë qëndrimit në Bet-Lehem i erdhi koha e lindjes. ⁷Ajo lindi djalë, të parin fëmijë, e mbështolli (shtrënguar) me rripa stofi dhe e shtriu në një grazhd, sepse nuk kishin gjetur strehim tjetër.

Barinjtë dhe engjëjt

⁸Në atë vend rrinin barinjtë fushës. Gjatë natës ishin në fushë dhe ruanin kopetë e tyre. ⁹Engjëlli i Zotit iu afrua, drita e pranisë së Zotit ndriti rreth tyre, dhe ata u trembën shumë. ¹⁰Engjëlli u tha: «Mos kini frikë, sepse po vij te ju për t'ju dhënë një lajm të mirë për të cilin do të gëzohet i tërë populli i Izraelit. ¹¹Sot në qytetin e Davidit ka lindur Shpëtimtari juaj — Mesia*, Zoti*. ¹²Shkoni dhe binduni vetë: ai ndodhet i mbështjellë me rripa stofi dhe i shtrirë në grazhd: nga kjo shenjë do ta njihni!» ¹³Menjëherë, me engjëllin u duk një turmë e madhe ushtrie qiellore, të cilët lavdëronin Perëndinë dhe brohoritën: ¹⁴«Lavdi Perëndisë në qiell, dhe në tokë, paqë popullit të zgjedhur të Tij.» ¹⁵Kur engjëjt u larguan prej tyre për në qiell, barinjtë i thanë njëri-tjetrit: «Ejani të shkojmë në Bet-Lehem e të shikojmë se ç'ndodhi dhe çfarë na ka shpallur Zoti!» ¹⁶Ata u nisën menjëherë, shkuan atje dhe gjetën Marinë dhe Jozefin me foshnjën e vënë në grazhd. ¹⁷Pasi e panë, ata treguan se ç'u kishte thënë engjëlli për foshnjën. ¹⁸Të gjithë të pranishmit u çuditën për atë që u treguan barinjtë. ¹⁹Por Maria i ruante për vete të gjitha këto dhe mendohej vazhdimisht për to. ²⁰Barinjtë u kthyen në kopetë e tyre duke lavdëruar dhe duke falënderuar Perëndinë për gjithçka që dëgjuan dhe panë. Gjithçka u bë pikërisht siç iu kishte thënë engjëlli.

